


[www.BibleForChildren.org](http://www.BibleForChildren.org)

# Mateu 1



Isapeu ãã ra'yryrũũnamũ, Janeruwarete 'ga  
ywagipewara 'ga mua Mari ãã upe, Nasare pewara ãã  
upe. Gaprieua ywagipewara 'ga rera. Gaprieu 'ga 'ua,  
Janeruwarete 'ga je'ega rerua Mari ãã upe. Nimeni we  
Mari ãã. ããmãrama 'ga Jose 'ga. Jose 'ga Davi 'ga  
juapyrera. Iypy we 'gã nupe 'wryiarareteramũ 'ũi  
ma'efera 'ga futat poromũ, Daviramũ.



A'eramũ 'ga 'jau ẽẽ upe: —Erekyje awi,  
kari. Janeruwarete 'ga te ene rereko.  
Iku'i 'ga 'ũina ene ree. Enera'yt  
nipo ene. Kũima'e 'ga nipo  
enera'yra 'ga. Jejui 'jau ki ene  
eja'yra 'ga renũina— 'jau 'ga  
ẽẽ upe. —Kũima'eeteete 'ga  
te nipo. Janeruwarete 'ga te'i  
pẽ nupe 'jau: “Koromũ jera'yra 'ga”,  
te'i pẽ nupe 'ga resaukaa 'jau— 'jau  
'ga ẽẽ upe. —'Ga futat nipo anure  
Janeruwarete 'ga omogo

'wyrarareteramũ pẽ nupe,  
judeuramũ pẽ nupe, Jako 'ga  
juapyreramũ pẽ nupe— 'jau 'ga ẽẽ upe.



—Ymã we te ako Davi 'ga juapyrera  
'ga peapesak pejemogyau ikue.  
“Maranime gatu nipo Davi 'ga  
juapyrera 'ga ruri  
'wriarareteramũ akou janee?”  
pe'je 'ã pejemogyau jepi.  
A'ere 'awamũ 'ga ruri pẽ  
nupe. Enera'yramũ 'ga 'ga muri  
pẽ nupe, pẽnemiapesagera 'ga.  
Namutat 'ga rekoi  
'wriarareteramũ pẽ nupe. Nipy'ruawi  
futari 'ga akou.

Nateepawa'uweri futari nipo 'ga  
akou— 'jau 'ga ãẽ upe.



A'eramũ Mari ẽẽ 'jau 'ga upe:  
—Kũjãmukua we te 'ã je ako. Nokoi  
we te 'ã kũima'ea je ree. Ma'eramũ  
je kũima'e tejee ekoe'emauwe  
teja'yr ekoeteramũ nũrã? — 'jau  
ẽẽ 'ga upe. A'eramũ 'ga  
'jau ẽẽ upe nũ: —Ku'  
jywa 'ga 'Agesagea  
te nipo ene rereko ã.  
'Ga te kunumã  
amut enee ã.



A'eramũ nipo ene eja'yramũ.  
Ku'jywa 'ga te wa'yra 'ga amut  
enee. A'eramũ nipo 'ga  
wesageramũ. Nitywi'i futari 'ga  
tywera 'ga ree — 'jau 'ga ãẽ upe.



A'eramũ Mari ẽẽ ikoai'i awau Isapeu ẽẽ 'wyr ipe.  
“Oo pa je kynu resaka tekou kwy”, 'jau ẽẽ  
ojeupe. A'erauwe futat ẽẽ okaraemã  
mogatyrũmũ awau. Isapeu  
ẽẽ Judeja ywy pewara.  
Ywytyra pyte'rarimũ 'gã  
'wyr ruwi. A'eramũ  
Mari ẽẽ awau peu.



Amunaw ipe owaēmawe Mari ẽẽ awayayau  
osou Isapeu ẽẽ 'wyr ipe. Mari ẽẽ resakawe  
Isapeu ẽẽ 'jau ẽẽ upe: 1—Tereko? —Je  
rekoi 'we. Ene pyri je ruri  
tekou— 'jau Mari  
ẽẽ ẽẽ upe. Mari ẽẽ  
je'ega renupawe Isapeu  
ẽẽ ra'yra 'ga omỹina  
ẽẽ reweg ipe.  
A'erauwe futat  
Janeruwarete 'ga  
'Agesage ruri osou  
Isapeu ẽẽ pype.



Ēē rerekwaramū futat 'ua. A'eramū ēē 'jau  
Mari ēē upe: —Janeruwarete kīā  
ojejuka ene ree kyn. Janeruwarete kīā  
esage janee. Ma'eramū  
'ā ereko eku'iramū.  
Eneku'i 'ā ekou tekotee  
wā ku'i apyraapa— 'jau  
Isapeu ēē Mari ēē upe.  
—Enera'yra kīā ree  
taetu nipo kīā jejukai  
ene ree.



Nan Janeruwarete 'ga Jejui Kristu 'ga muri  
ywy pe rakue. Janeruwarete  
'ga 'Agesagea Jejui 'ga mua  
Mari ãã upe rakue, ãã  
ra'yramũ rakue. Mari ãã  
merama 'ga Jose 'ga.  
A'ere Jose 'ga ãã  
rerekoe'emauwe  
Janeruwarete 'ga  
'Agesagea kunumĩ muri  
ãã upe rakue. “Mari ãã  
ta'yt” 'e kwaapawe Jose  
'ga 'jau ojeupe:  
“Najera'yra rui futat.”



“Nakoi we je ẽẽ ree”, 'jau 'ga ojeupe. “Narekokatui je ẽẽ  
'awamũ. Maran ajee je  
ẽẽ rerekoi 'awamũ 'ũ?  
Namome'ua'uweri je ẽẽ  
'gã nupe. ‘Ta'yr ẽẽ’ 'e  
kwaawe'emaue pa je  
ẽẽ retygi kwy”, 'jau  
'ga ojeupe. Jose 'ga  
esage ma'ea.  
A'jeteetewi tee  
'ga mama'e apoi rakue.  
A'eramũ 'ga a'eramũ  
oporerekowere'emamũ ẽẽ  
ree. A'ere 'ga nafutari ẽẽ  
mojenosĩa nanẽ nũ.



Wemiaporam are 'ga wea'aramũ oser enune. 'Ga ser ire  
Janeruwarete 'ga pyriwara 'ga amũ 'ua ojesaukaa 'ga  
upe, 'ga fayupaw ipe. A'eramũ  
'ga oje'ega Jose 'ga upe, judeu  
'gã 'wyriat ymanera 'ga juapyrera  
'ga upe, Davi 'ga juapyrera 'ga upe:  
—Ku'jywa 'ga 'Agesagea te kunumĩ amut  
Mari ãã upe. A'eramũ ene  
epy'a'wyre'emamũ  
ãã ree.



“Narekoi je ãã”, ere awi. Kũima'ea futat ãã ra'yra 'ga. 'Ga  
'aramũ ene 'ga re'roka. 'Ga futat 'ut opytuna 'gã tywera  
moiawamũ 'gã nui. A'eramũ ene  
Jejui nuga 'ga ree— 'jau ywagipewara  
'ga Jose 'ga fayupaw ipe 'ga upe.



Opag ire Jose 'ga awau Mari ãã 'wyr ipe, ãã rerua  
oje'wyr ipe, ywagipewara 'ga 'eawer imũ etee futat  
rakue. A'ere 'ga ãã ra'yra 'ga 'are'emauwe  
nokoi futari ãã ree. ãã ra'yra 'ga 'ar ire  
Jose 'ga 'ga re'rogi. Jejuja 'ga inuga  
'ga ree, ywagipewara 'ga 'eawer imũ  
etee futat.



'Wyarararete 'ga Augusto 'ga. A'eramũ 'ga 'jau ojeupe:  
“Marãmaran te jeremiayuwa pytuna nũ?” 'jau 'ga ojeupe.  
A'eramũ 'ga 'gã nera  
kwasiarukaa ojeupe.

—Pekwap  
pejeje'wyr ipe  
pejejera



kwasiarukaa  
'gã nupe— 'jau 'ga 'gã  
nupe, oje'ega monou wemiayuwa 'gã nupe.



—A'ere simojopyrũ pẽẽ 'jau, pẽnera kwasiarukar ire  
'jau— 'jau 'ga 'gã nupe. A'eramũ 'gã awaupap wera  
kwasiarukaa wamỹja  
jeupawer ipe etee futat.  
A'eramũ Jose 'ga  
nanẽ awau



Garireja ywy awi.



Nasare awi 'ga awau Judeja ywy pe, wamỹja 'ga Davi  
'ga 'wyrer ipe. Perēi me Davi 'ga 'ari rakue. A'eramũ  
'ga awau peu, wamỹja  
jeupawer ipe.

Wemirekoram ēē  
rerawau, Mari  
ēē rerawau



ojeupi wera kwasiarukaa 'gã nupe.



Ëẽ ra'y'ra ja'wyja'wyrāmũ 'ga ãẽ rerawau Perẽi me.  
A'ere kwaiwete 'gã oi peu. A'eramũ 'gã wawa 'oga  
ojumypykware' emamũ 'gã  
nupe. A'eramũ Jose 'ga  
ãẽ rerawau wyra  
jagawa pype



erosou 'ara ro'ysag awi.



Peu 'gã nekoramũ Mari  
ẽẽ ra'yr ypy 'ga u'aa.



Ga 'ar ire 'ga auwana taity pyu, 'ga monou 'ga nuga  
ywyari pype.



Jejui 'ga 'aramũ ywagipewara 'ga 'ua ojypa ojesaukaa  
wyrã jara 'gã nupe. Mukuu'i 'gã nekoï Perẽi awi. Jũ me  
'gã nekoï weymawa pyri. Karupa'mĩa  
'gã neymawa. Ypytunimũ  
agawewi.



A'etea 'ara 'jawe imojesaka 'gã nupe. Tata eny  
'jawewara rerua erojypa 'gã nupe. Janeruwarete 'ga  
ojemuenyu 'gã nupe. A'eramũ 'gã  
okyjau 'ga reny awi.



A'eramũ jui 'gã kyjeramũ ywagipewara 'ga 'jau 'gã nupe:  
—Pekyje awi. Moranuw esagea te je arut amũ  
imome'wau pẽ nupe. A'ea moranuwa  
pyu tamaku'i pẽẽ 'jau  
—'jau 'ga  
'gã nupe.



—A'ea nipo 'gā amaku'i imogyau najuejue etee. Awa  
'ara rupi pē katu'okara 'ga 'ari Perēi me ko.  
Janeruwarete 'ga remimurera 'ga  
'ari ko.



Pẽjararete 'ga 'ari ko, pẽnemiapesagera 'ga 'ari ko  
— 'jau 'ga 'gã nupe. — Taity pyu 'ga jeuwani 'upa ywya'ri  
pype. A'eramũ pẽẽ 'awamũ pejewau  
'ga resaka.



Jeremimome'ufer imũ etee futat nipo peesak 'ga ruwamũ. “A'jea futat jane esagi 'ga remimome'ufer imũ etee futat”, 'jau nipo pẽẽ pejejaupe — 'jau 'ga 'gã nupe.



Ojete'e'i ra'ne ywagipewara 'ga 'ua. A'ere kwaiwete 'gã  
'ua ajatykau 'ur ypy ma'e 'ga ree.  
—Nitywi 'ga amũ Janeruwarete 'ga  
'jawe.



'Ga te 'ã esage— 'jau 'gã ajaupe. —Ywagipewaramũ ore  
'jau: “Ene te 'ã eneresage jepi.” Ywy  
pewara 'gã nanẽ 'jau nũ: “Ene te  
'ã eneresage jepi”



'jau 'gã ajemogyau  
Jarejuwarete  
'ga upe.



A'eramũ 'ga ojee oryp ma'e 'gã mopy'ata'wau— 'jau  
'gã ajemogyau.



A'ere ywagipewara 'gã awau ojewya ywag ipe nũ.  
A'eramũ wyra jara 'gã 'jau ajaupe: —Pe'je ajee soo  
Perẽi me 'ga resaka 'ũ. “Pe'je pejewau 'ga resaka, e'i  
Janeruwarete 'ga pẽ nupe”, e'i ako ywagipewara 'ga  
janee ko. A'eramũ jane jarewau 'ga resaka—  
'jau 'gã ajaupe.



A'eramũ futat 'gã awau jupiwewe futat  
kunumĩakyrã 'ga resaka. Owaẽm ire 'gã  
'ga resaka. Mari ãã resaka Jose 'ga  
reewe. Kunumĩakyrã 'ga resaka ywya'ri  
pype 'ga ruwamũ.



Ga resag ire 'gã awau 'ga mome'wau  
amunaw ipewara 'gã nupe:

—Ywagipewara 'ga 'ut ojesaukaa oree ko.  
“Pẽ katu'okara 'ga u'at Perẽi me ko”, e'i  
'ga oree ko. A'eramũ ore arajua  
'ga resaka.



A'ere a'jea'jea futat 'ga 'i ra'e. 'Ga 'eawer  
imũ etee futat ore kunumĩakyrá 'ga  
resagi— 'jau 'gã 'gã nupe. A'eramũ 'gã  
aipo ojeupe 'gã 'eramũ ajemogyau  
oporesagamũ 'gã nee.



Perēi me Jejui 'ga  
u'aa rakue. Judeja  
ywy pype Perēi  
'jawa amunawa  
'upa. Israeu  
juapyrera 'gã

nupe 'wyrriaramũ Erote 'ga renamũ  
Jejui 'ga u'aa rakue. Jejui 'ga 'ar ire  
kũima'e 'gã amũ 'ua Jerusareg ipe,  
Erote 'ga rekwaw ipe. Muku awi 'gã  
nuri. Kwara poawa katy awi 'gã  
nuri. Jaytata mojopyrũara 'gã.



'Gã poromũ 'ut  
muku awi. A'eramũ  
'gã oporonupa ee  
judeu 'gã nupe:  
—Ma'ape Te

pẽ'wyrarareterama  
'ga 'ari 'awamueuu rai'i?  
Oroje'wyr ipe ore rekoramũ  
jaytata yau renyfugamũ  
ojesaukaa oree ai'i.



Esakawe ore 'jau arajaupe  
ai'i: “Judeu 'gã 'wryiarareterama  
'ga u'at ra'e”, 'jau ore arajaupe  
ai'i. A'eramũ ore arajua koromũ  
'ga muorypa arakou— 'jau 'gã  
Jerusareg ipewara 'gã nupe.



A'eramũ Erote 'ga muku awi  
'ut ma'efera 'gã nenũina.  
—Pe'je pejejua. 'Gã  
nemianuwa tywi  
saporogyta jarejete  
'jau— 'jau 'ga 'gã nupe.  
A'eramũ 'gã awau oporogytau  
'ga upe. A'eramũ 'ga 'jau 'gã  
nupe: —Maranime te peesak  
jaytata yaua rai'i? Ma'e  
'ara rupi te  
peesak  
rai'i?  
— 'jau 'ga  
'gã nupe.



A'eramũ 'gã jaytata yau  
resakawera mome'wau esage  
'ga upe. A'eramũ Erote  
'ga 'jau 'gã nupe: —Pe'je  
pejewau Perẽi me. “Perẽi  
me futat ore'wriarareterama  
'ga 'ari”, e'i mainana 'wriara  
'gã jee— 'jau 'ga jaytata yau  
resakarera 'gã nupe.  
—A'eramũ pẽẽ pejewau  
'ga rekaa.



'Ga resag ire tepejot 'ga  
rekwawa mome'wau jee  
'jau. A'eramũ je nanẽ tewau  
'ga muorypa— 'jau Erote  
'ga 'gã nupe. A'ere  
o'meramũ te Erote 'ga 'i 'gã  
nupe. “Ga rekwawa tejeupe  
'gã imome'u re too 'ga jukau  
'jau kwy”, e'i te 'ga ojeupe.



Ojeupe 'ga imome'u re 'gã awau nũ. 'Gã waw ipe jaytata yau ojesaukaru'japa 'gã nupe nũ. —Kuu.

Kweramũ janeremiesagera rekoi ra'e kũi— 'jau 'gã ajaupe. A'eramũ 'gã aku'iramũ jaytata yau are. Jaytata weny rerawau 'gã nenune. A'eramũ 'gã jaytata reny rewiri etee futat akou. Awau jaytata opytau Jejui 'ga rekwawa 'oga 'arimũ.



A'eramũ 'gã awau osou 'ga 'wyr ipe. Kunumĩĩ 'ga 'gã  
esaka 'ga y ěě retee, Mari ěě retee. A'eramũ 'gã  
wapyka wenupy'ãu Jejui 'ga rowase 'ga  
muorypa. A'eramũ 'gã  
wemirerurera okaraemã  
renũ'jãu imua wepyrũ awi  
imonou 'ga upe. Ouru,  
Janeruwarete 'ga  
upe iapypyra jany  
kasig, mira 'jawa  
jany kasig.



Mĩmera 'gã imonou Jejui 'ga upe. 'Ga upe 'gã  
nemirerurera epy ete mama'ea. Ypytunimũ  
Janeruwarete 'ga oje'ega jaytata  
mojopyrũara 'ga amũ upe 'ga  
fayupaw ipe: —Pejewyt kasi  
pejewau Erote 'ga pyu ne  
—'jau 'ga 'ga upe,  
'ga fayupaw ipe.



Opag ire ofayup ma'efera 'ga imome'wau opytuna 'gã  
nupe. A'eramũ 'gã awawe'em Erote 'ga pyu. Amutee  
pe rupi etee 'gã awau ojewya  
oje'wyr ipe nũ.



'Gã o re ywagipewara 'ga amũ  
ojesaukaa Jose 'ga upe. 'Ga  
fayupaw ipe 'ga ojesaukaa  
oje'ega 'ga upe: —Erote 'ga  
ifuewet Jejui 'ga ree.  
Anurenure'i nipo 'ga  
wemiayuwa 'gã murukari  
Jejui 'ga rekaa, 'ga  
jukaawamũ.



A'eramũ ene 'awauwe futat 'ga  
rerawau 'ga y ãẽ retee  
eroka'jama 'ga wi. Egitu ywy  
pe pekwap. Peu futat  
pejepytaw. “Pe'je pejewya  
Judeja ywy pe”,  
pejejeupe je'e'emamũ  
pẽẽ pejekou Egitu ywy  
pe etee futat— 'jau

ywagipewara 'ga Jose 'ga  
upe, 'ga fayupaw ipe.





A'erauwe Jose 'ga ojypa,  
okaraemã mogatyrũmũ.  
Ypytunimũwe futat 'ga Jejui  
'ga rerawau 'ga y ãã reewe  
'gã neroka'jama erawau Egitu  
ywy pe. Erote 'ga  
manũe'emamũ 'gã akou  
Egitu ywy pe etee futat.



Ymã te Janeruwarete 'ga  
oje'ega kwasiarukari Oseja  
'ga upe rakue: “Egitu ywy awi  
je teja'yra 'ga muri”, 'jau 'ga  
ikwasiarukaa 'ga upe rakue.  
A'eramũ  
'ga u'eawer imũ etee  
futata 'gã monoukaa  
Egitu ywy pe.





Erote 'ga jaytata mojoyrũara  
'gã napesaka 'ũina numiamũ.  
A'ere 'gã nooi 'ga pyu. “Tỹỹ.  
Nuri futari te 'gã imome'wau jee  
'wei. Je morytee pa 'gã nai'i”,  
'jau 'ga ojeupe. A'eramũ 'ga  
amara'neramũ 'ũina 'gã nee.



A'eramũ 'ga wea'aramũ jaytata  
mojopyrũara 'gã je'eger are  
jaytata yau resakawer are.



A'eramũ 'gã 'jau: “Nomagwawi  
we kunumĩ 'ga mukũi kwara”,  
'jau 'ga ojeupe. A'eramũ 'ga 'jau  
wemiayuwa 'gã nupe:



—Pe'je pejewau  
kununĩĩĩ apisaupap.



Perēi mewara 'gã na'yra 'gã,  
ipyriu'i ajemogy ma'e 'gã na'yra  
'gã. Mĩmera ki peapisi. Mukũi  
kwara magwapare'ema 'gã  
juejue ki peapisi— 'jau Erote 'ga  
wemiayuwa 'gã nupe.



Anure, Erote 'ga manū re,  
Janeruwarete 'ga ojeypyriwara  
'ga amū resaukaa Jose 'ga  
upe, 'ga fayupaw ipe. —Jejui  
'ga ree ifuewet ma'e 'ga  
amanū 'awamū. A'eramū  
ene ga rerawau  
erojewya ga y ãẽ retee  
pejewya Israeu  
juapyreramū

pejeywy pe— 'jau  
ywagipewara 'ga Jose  
'ga upe 'ga fayupaw ipe.




Oywy upe owaēmawe Jose 'ga 'wyrriara 'ga rera  
renupa. “Erote 'ga  
ra'yra 'ga, Akirau 'ga  
'ūi 'wyrriaramū Judeja  
ywy pewara 'gã  
nupe”,

'jau 'ga amū  
Jose 'ga upe. A'eramū  
'ga okyjau 'ga pyri oo awi. A'eramū  
ywagipewara 'ga ojesaukaa 'ga upe  
nū, 'ga fayupaw ipe nū.



“Garireja ywy pe pekwap”, 'jau 'ga 'ga upe, 'jau 'ga 'ga upe, 'ga fayupaw ipe. A'eramũ Jose 'ga 'gã nerawau Garireja ywy pe. Nasare 'jawa amunawa 'upa



Garireja ywy pype. futat. A'eramũ Jose 'ga 'gã nerawau 'gã neropytau Nasare pe. Ymã te Janeruwarete 'ga je'ega mome'wara 'gã 'i rakue: “Anure nipo 'gã 'i 'ga remimono 'ga upe, . . .”



“ . . . Nasare pe waranup ma'efera 'ga, 'jau nipo 'gã 'ga upe”, 'jau Janeruwarete 'ga je'ega mome'wara 'gã nakue.



A'eramũ Jose 'ga  
Jejui 'ga muaranupa Nasare  
pe futat, 'gã 'eawer imũ etee futat.



—Janeruwarete 'ga iporomutat  
nanimenime pẽ nee. A'eramũ 'ga  
a'eramũ wa'yramũ je mua 'au ywy pe  
ikue. Majepei tee agawewi je 'ga  
ra'yramũ. A'etea 'ga je mut 'awa  
ywy pe je jukaukaa  
pẽ nupe.



A'eramũ je rerowiaara 'gã amanũmũ  
numiamũ. A'ere 'gã oi oferapa  
Jarejuwarete 'ga rupaw ipe 'ga pyri  
amanũu'jape'ema futat. Peu futat 'gã  
jemogyi nakwaparimũ ete rũi—  
'jau Jejui 'ga Nikutemu  
'ga upe.



## Romans 3:23

Najuejue etee futat 'ã janetyweramũ Ku'jywa 'ga upe. Nitywi futari esage ma'e 'ga amũ Ku'jywa 'ga upe. Esage ma'e 'gã etee ajemogyau Ku'jywa 'ga pyri. A'eramũ jane najuejue etee futat jarejemogyau mukumuku 'ga wi. Najane mũ upe etee rũi Ku'jywa 'ga 'i: “Ejetee ejemuesage jee”, 'jawe'em.

## Romans 6:23

Anure nipo Janeruwarete 'ga jane mepyau janeremiapofer are. Mama'e tywera apoara 'gã 'ga imonou muku ojewi. Mama'eukwaawa rapyaw ipe 'ga 'gã monou. Aipoa 'gã nemiapoferarũe'ema repya. A'ere Jejui Kristu 'ga rerowiaaramũ janee Janeruwarete 'ga mama'e esage apou. Jejui Kristu 'ga Janejararetea. 'Ga ree jarejemujar ire Janeruwarete 'ga ojoporoywera 'jawe imua janee. Wa'yra 'ga jane erowiaaramũ 'ga jane mogyau ojepyri nakwaparimũ warãu rũi futat nipo.



## Hebrews 9:27

Ywy pewaramũ jane jaremanũmũ najuejue etee futat. Majepei tee futat jane manũi. Nimanũu'jau'jawi jane. Jaremanũ re nipo jane jarewau jarejesaukaa Jarejuwarete 'ga rowase. A'eramũ nipo Janeruwarete 'ga wa'yra 'ga rerowiaaramũ jane monou jane mogyau ojepyri. Wa'yra 'ga rerowiare'ema 'gã nipo 'ga imonou muku ojewi.

## Ephesians 2:8,9

A'ere 'ã 'ga jemuaẽmi te jane ree. A'eramũ 'ga jane katu'oka, Jejui Kristu 'ga jane erowiararamũ. Niapoi agawewi futat 'ã jane mama'e esagea 'ga upe rakue. A'etea 'ã 'ga ajemuaẽm jane ree, jane katu'oka. 'Ga futat Kristu 'ga rerowiarukaa janee. Napẽnemiapofera mepyawamũ rũi 'ga pẽ katu'ogi. A'eramũ pẽẽ pejejerowiaraipe'ema pejejee 'ga rerowiaaramũ ne.



## Romans 10:9,10

Jejui Kristu 'ga rerowiaara 'gã Janeruwarete 'ga okatu'ok.  
“Jejui Kristu 'ga jejararetea”, 'jau pẽẽ. “Janeruwarete 'ga  
Jejui 'ga omoferap” 'ea pẽẽ erowiaa. A'eramũ  
Janeruwarete 'ga pẽ katu'oka, pẽ pireita pẽtywer awi. “Jejui  
'ga oferap” 'ea jane erowiar ire Janeruwarete 'ga 'jau janee:  
“Pẽẽ jera'yra 'ga perowiat. A'eramũ pẽẽ pejejesageramũ  
jee”, 'jau nipo 'ga janee, Jejui 'ga jane erowiarãmũ. Jejui  
Kristu 'ga jejararetea jane 'eramũ Janeruwarete 'ga jane  
katu'oka janetywer awi.



## John 3:16,17

—Janeruwarete 'ga iporomutat nanimenime pẽ nee. A'eramũ 'ga a'eramũ wa'yramũ je mua 'au ywy pe ikue. Majepei tee agawewi je 'ga ra'yramũ. A'etea 'ga je mut 'awa ywy pe je jukaukaa pẽ nupe. A'eramũ je rerowiaara 'gã amanũmũ numiamũ. A'ere 'gã oi oferapa Jarejuwarete 'ga rupaw ipe 'ga pyri amanũu'jape'ema futat. Peu futat 'gã jemogyi nakwaparimũ ete rũi— 'jau Jejui 'ga Nikutemu 'ga upe.

—Napẽ nereko tyweawamũ rũi 'ga je muri 'au ywy pe. Pẽ katu'okawamũ te 'ga je muri— 'jau 'ga Nikutemu 'ga upe.



## 1 John 5:11-13

“Jera'yrarete 'ga amanũ pẽ katu'okawamũ. A'eramũ 'ga werowiaaramũ pẽ mogyau namutat oje'jawe. A'eramũ nipo pẽẽ pejemanũ re pejejua 'au pejejemogyau ore pyri jera'yra 'ga rerowiaaramũ pẽẽ nakwaparimũ warãu rũi futat”, 'jau Janeruwarete 'ga janee rakue. 'Ga ra'yra 'ga rerowiaara 'gã ajemogyau namutat 'ga 'jawe. Amanũ re awau ajemogyau Jarejuwarete 'ga pyri nakwaparimũ warãu rũi futat. A'ere 'ga ra'yra 'ga rerowiare'ema 'gã nooa'uweri 'ga pyri amanũ re. Muku te 'gã oi 'ga wi.

Jejui 'ga ree pejemogypyk pejejemogyau. A'eramũ je ka'arana kwasiaa pẽ nupe, pẽ mu'jau Jarejuwarete 'ga pyri jarejemogy are.



Mateu 1-2; Luka 1-2

Storyline by: Edward D. Hughes

Illustrated by: M. Maillot  
and Alastair Paterson

Adapted by: E. Frischbutter; Sarah S.

Kayabi NT (kyz) © 2012, Wycliffe Bible Translators, Inc. All  
rights reserved.

<https://live.bible.is/bible/KYZWBT/MAT/1>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

